



大乘金剛般若寶懺

金剛寶懺

旃陀羅引（序文 說明金剛寶懺的因緣 可以不用念）

昔有旃陀羅，日殺千羊，販肉自活。經過寺中，拾得一紙，有三千佛名，隨奉歸家供養，當日媳生一肉卵，破有八童子，及長形狀，醜陋揚眉，努目揮拳掉臂，見者莫不恐懼，大為殃禍。後又生一卵，自謂先所生，既為人害，今必不祥，將棄之，空中叱曰，當善護勿輕毀，迨卵破得四女，顏貌端嚴，人所喜見，雖不讀書，亦能識字，出語成文，受持齋戒，誦金剛經，禮金剛懺，一心好善。八兄弟感而改惡從善，其父亦修，兄為八金剛妹為四菩薩。

註：原來這就是金剛經四菩薩八金剛的因緣（金剛眷菩薩、金剛索菩薩、金剛愛菩薩、金剛語菩薩）（青除災金剛、辟毒金剛、黃隨求金剛、白淨水金剛、奉請赤聲火金剛、定除災金剛、紫賢金剛、大神金剛）

香讚

爐香乍爇 法界蒙熏 諸佛海會悉遙聞

隨處結祥雲 誠意方殷 諸佛現全身

南無香雲蓋菩薩摩訶薩 (三稱)

南無本師釋迦牟尼佛 (三稱)

開經偈

無上甚深微妙法 百千萬劫難遭遇

我今見聞得受持 願解如來真實義

大乘金剛般若寶懺卷上

(姚秦三藏法師鳩摩羅什奉詔翻譯)

如是我聞 一時 佛在舍衛國 祇樹給孤獨園 與大比丘眾 千二百五十人俱 爾時世尊 食時著衣持鉢入舍衛大城乞食 於其城中 次第乞已 還至本處 飯食訖 收衣鉢 洗足已 敷座而坐 時長老須菩提在大眾中 即從座起 偏袒右肩 右膝著地 合掌恭敬 而白佛言 希有世尊 如來善護念諸菩薩 善付囑諸菩薩 世尊 善男子善女人 發阿耨多羅三藐三菩提心 云何應住 云何降伏其心 佛言善哉善哉 須菩提 如汝所說 如來善護念諸菩薩 善付囑諸菩薩 汝今諦聽 當為汝說 善男子善女人 發阿耨多羅三藐三菩提心 應如是住 如是降伏其心 唯然世尊 願樂欲聞

大慈大悲愍眾生 大喜大捨濟含識
相好光明以自嚴 眾等至心歸命禮

南無過去毘婆尸佛

南無尸棄佛 南無毘舍浮佛

南無拘留孫佛 南無拘那含牟尼佛

南無迦葉佛 南無釋迦牟尼佛

南無彌勒佛 南無師子佛

南無明燄佛 南無牟尼佛

南無妙華佛 南無華氏佛

南無善宿佛 南無道師佛

南無大臂佛 南無大力佛

南無宿王佛 南無脩藥佛

南無名相佛 南無大明佛

南無燄肩佛 南無照耀佛

南無青除災金剛 南無辟毒金剛

佛告須菩提 諸菩薩摩訶薩應如是降伏其心 所有一切眾生之類 若卵生
若胎生 若濕生 若化生 若有色 若無色 若有想 若無想 若非有想
非無想 我皆令入無餘涅槃而滅度之 如是滅度無量無數無邊眾生 實無
眾生得滅度者 何以故 須菩提 若菩薩有我相 人相 眾生相 壽者相
即非菩薩 復次須菩提 菩薩於法 應無所住 行於布施 所謂不住色布
施 不住聲香味觸法布施 須菩提 菩薩應如是布施 不住於相 何以故
若菩薩不住相布施 其福德不可思量 須菩提 於意云何 東方虛空可思
量不 不也 世尊 須菩提 南西北方 四維上下虛空 可思量不 不也
世尊 須菩提 菩薩無住相布施 福德亦復如是 不可思量 須菩提 菩
薩但應如所教住 須菩提 於意云何 可以身相見如來不 不也 世尊
不可以身相得見如來 何以故 如來所說身相 即非身相 佛告須菩提
凡所有相 皆是虛妄 若見諸相非相 即見如來 須菩提 白佛言 世尊
頗有眾生 得聞如是言說章句 生實信不 佛告須菩提 莫作是說 如來
滅後 後五百歲 有持戒修福者 於此章句 能生信心 以此為實 當知
是人 不於一佛二佛 三四五佛 而種善根 已於無量千萬佛所種諸善根

聞是章句 乃至一念生淨信者 須菩提 如來悉知悉見 是諸眾生 得如
是無量福德 何以故 是諸眾生 無復我相 人相 眾生相 壽者相 無
法相 亦無非法相 何以故 是諸眾生 若心取相 即為著我人眾生壽者
若取法相 即著我人眾生壽者 何以故 若取非法相 即著我人眾生壽者
是故不應取法 不應取非法 以是義故 如來常說 汝等此丘 知我說法
如筏喻者 法尚應捨 何況非法

南無日藏佛 南無月氏佛

南無眾燄佛 南無善明佛

南無無憂佛 南無提沙佛

南無明曜佛 南無持鬘佛

南無功德明佛 南無示義佛

南無燈曜佛 南無興盛佛

南無藥師佛 南無善濡佛

南無白毫佛 南無堅固佛

南無福威德佛 南無不可壞佛

南無德相佛 南無羅睺佛

南無眾主佛 南無梵聲佛

南無堅際佛 南無不高佛

南無作明佛 南無大山佛

南無金剛佛 南無將眾佛

南無黃隨求金剛 南無白淨水金剛

佛告須菩提 於意云何 如來得阿耨多羅三藐三菩提耶 如來有所說法耶

須菩提言 如我解佛所說義 無有定法 名阿耨多羅三藐三菩提 亦無有

定法如來可說 何以故 如來所說法 皆不可取 不可說 非法非非法

所以者何 一切賢聖 皆以無為法 而有差別 須菩提 於意云何 若人

滿三千大千世界七寶 以用布施 是人所得福德 寧為多不 須菩提言

甚多 世尊 何以故 是福德 即非福德性 是故如來說福德多 若復有

人 於此經中 受持乃至四句偈等 為他人說 其福勝彼 何以故 須菩

提 一切諸佛 及諸佛阿耨多羅三藐三菩提法 皆從此經出 須菩提 所
謂佛法者 即非佛法

南無無畏佛 南無珍寶佛

南無華日佛 南無軍力佛

南無香燄佛 南無仁愛佛

南無大威佛 南無梵王佛

南無無量明佛 南無龍德佛

南無堅步佛 南無不虛見佛

南無精進德佛 南無善守佛

南無歡喜佛 南無不退佛

南無師子相佛 南無勝知佛

南無法氏佛 南無喜王佛

南無妙銜佛 南無愛作佛

南無德臂佛 南無香象佛

南無觀視佛 南無雲音佛

南無善思佛 南無善高佛

南無赤聲金剛 南無定持災金剛

須菩提 於意云何 須陀洹能作是念 我得須陀洹果不 須菩提言 不也
世尊 何以故 須陀洹 名為入流 而無所入 不入色聲香味觸法 是名
須陀洹 須菩提 於意云何 斯陀含能作是念 我得斯陀含果不 須菩提
言 不也 世尊 何以故 斯陀含 名一往來 而實無往來 是名斯陀含
須菩提 於意云何 阿那含能作是念 我得阿那含果不 須菩提言 不也
世尊 何以故 阿那含 名為不來 而實無不來 是故名阿那含 須菩提
於意云何 阿羅漢能作是念 我得阿羅漢道不 須菩提言 不也 世尊
何以故 實無有法 名阿羅漢 世尊 若阿羅漢作是念 我得阿羅漢道
即為著我人眾生壽者 世尊 佛說我得無諍三昧 人中最為第一 是第一
離欲阿羅漢 世尊 我不作是念 我是離欲阿羅漢 世尊 我若作是念
我得阿羅漢道 世尊 即不說須菩提是樂阿蘭那行者 以須菩提實無所行

而名須菩提是樂阿蘭那行 佛告須菩提 於意云何 如來昔在然燈佛所
於法有所得不 不也 世尊 如來在然燈佛所於法實無所得 須菩提 於
意云何 菩薩莊嚴佛土不 不也 世尊 何以故 莊嚴佛土者 即非莊嚴
是名莊嚴 是故須菩提 諸菩薩摩訶薩 應如是生清淨心 不應住色生心
不應住聲香味觸法生心 應無所住而生其心 須菩提 譬如有人 身如須
彌山王 於意云何 是身為大不 須菩提言 甚大 世尊 何以故 佛說
非身 是名大身 須菩提 如恒河中 所有沙數 如是沙等恒河 於意云
何 是諸恒河沙 寧為多不 須菩提言 甚多 世尊 但諸恒河尚多無數
何況其沙 須菩提 我今實言告汝 若有善男子善女人 以七寶滿爾所恒
河沙數 三千大千世界 以用布施 得福多不 須菩提言 甚多 世尊
佛告須菩提 若善男子善女人 於此經中 乃至受持四句偈等 為他人說
而此福德 勝前福德 復次須菩提 隨說是經 乃至四句偈等 當知此處
一切世間天人阿修羅 皆應供養 如佛塔廟 何況有人盡能受持讀誦 須
菩提 當知是人 成就最上第一希有之法 若是經典所在之處 即為有佛
若尊重弟子

南無離垢佛 南無月相佛
南無大名佛 南無珠髻佛
南無威猛佛 南無師子吼佛
南無德樹佛 南無歡釋佛
南無慧聚佛 南無安住佛
南無有意佛 南無鶖伽佉佛
南無無量意佛 南無妙色佛
南無多智佛 南無光明佛
南無堅戒佛 南無吉祥佛
南無寶相佛 南無蓮華佛
南無那羅延佛 南無安樂佛
南無智精佛 南無德敬佛
南無紫賢金剛 南無大神金剛

懺悔文

弟子某甲 至心懺悔 自從無始 至於今日 未識佛時 未聞法時 未遇
僧時 不知善惡 不信因果 遇不善緣 近惡知識 動身口意 無惡不為
身業不善 行殺盜淫 口業不善 妄言 綺語 惡口 兩舌 意業不善
起貪嗔癡 殺父殺母 殺阿羅漢 破和合僧 出佛身血 焚燒塔寺 誹謗
大乘 侵損常住 汙梵誣僧 犯諸禁戒 作不律儀 自作教他 見聞隨意
如是等罪 無量無邊 今日披陳 發露懺悔 惟願三寶 同賜哀憐 令我
罪根 一念霜融 悉皆清淨

舉讚

金剛神將 護法龍天 佛光普照徧三千 福壽廣無邊 滅罪消愆 悉令證
真源

南無求懺悔菩薩摩訶薩 (三稱)

大乘金剛般若寶懺卷中

爾時須菩提白佛言 世尊 當何名此經 我等云何奉持 佛告須菩提 是經名為金剛般若波羅蜜 以是名字 汝當奉持 所以者何 須菩提 佛說般若波羅蜜 即非般若波羅蜜 是名般若波羅蜜 須菩提 於意云何 如來有所說法不 須菩提白佛言 世尊 如來無所說 須菩提 於意云何 三千大千世界所有微塵 是為多不 須菩提言 甚多 世尊 須菩提 諸微塵 如來說非微塵 是名微塵 如來說世界 非世界 是名世界 須菩提 於意云何 可以三十二相見如來不 不也 世尊 不可以三十二相得見如來 何以故 如來說三十二相 即是非相 是名三十二相 須菩提 若有善男子善女人 以恆河沙等身命布施 若復有人 於此經中 乃至受持四句偈等 為他人說 其福甚多

讚佛偈

天上天下無如佛 十方世界亦無比
世間所有我盡見 一切無有如佛者
剎塵心念可數知 大海中水可飲盡
虛空可量風可繫 無能說盡佛功德

南無梵德佛 南無寶積佛

南無華天佛 南無善思議佛

南無法自在佛 南無名聞意佛

南無樂說聚佛 南無金剛相佛

南無求利益佛 南無遊戲神通佛

南無離闇佛 南無名天佛

南無彌樓相佛 南無眾明佛

南無寶藏佛 南無極高行佛

南無金剛楯佛 南無珠角佛

南無德讚佛 南無日月明佛

南無日明佛 南無星宿佛

南無清淨義佛 南無違藍王佛

南無福藏佛 南無見有邊佛

爾時須菩提 聞說是經 深解義趣 涕淚悲泣而白佛言 希有世尊 佛說
如是甚深經典 我從昔來 所得慧眼 未曾得聞如是之經 世尊 若復有
人 得聞是經 信心清淨 即生實相 當知是人 成就第一希有功德 世
尊 是實相者即是非相 是故如來說名實相 世尊 我今得聞如是經典
信解受持 不足為難 若當來世後五百歲 其有眾生 得聞是經 信解受
持 是人即為第一希有 何以故 此人無我相 無人相 無眾生相 無壽
者相 所以者何 我相即是非相 人相 眾生相 壽者相 即是非相 何
以故 離一切諸相 即名諸佛 佛告須菩提 如是如是 若復有人 得聞
是經 不驚不怖不畏 當知是人 甚為希有 何以故 須菩提 如來說第
一波羅蜜 即非第一波羅蜜 是名第一波羅蜜 須菩提 忍辱波羅蜜 如

來說非忍辱波羅蜜 是名忍辱波羅蜜 何以故 須菩提 如我昔為歌利王
割截身體 我於爾時 無我相 無人相 無眾生相 無壽者相 何以故
我於往昔節節支解時 若有我相 人相 眾生相 壽者相 應生嗔恨 須
菩提 又念過去於五百世 作忍辱仙人 於爾所世 無我相 無人相 無
眾生相 無壽者相 是故須菩提 菩薩應離一切相 發阿耨多羅三藐三菩
提心 不應住色生心 不應住聲香味觸法生心 應生無所住心 若心有住
即為非住 是故佛說菩薩心 不應住色布施 須菩提 菩薩為利益一切眾
生故 應如是布施 如來說一切諸相 即是非相 又說一切眾生 即非眾
生 須菩提 如來是真語者 實語者 如語者 不誑語者 不異語者 須
菩提 如來所得法 此法無實無虛 須菩提 若菩薩心住於法 而行布施
如人入暗 即無所見 若菩薩心 不住法 而行布施 如人有目 日光明
照 見種種色 須菩提 當來之世 若有善男子善女人 能於此經受持讀
誦 即為如來 以佛智慧 悉知是人 悉見是人 皆得成就無量無邊功德

南無電明佛 南無金山佛
南無師子德佛 南無勝明佛
南無明讚佛 南無堅精進佛
南無具足讚佛 南無離畏師佛
南無應天佛 南無大燈佛
南無世明佛 南無妙音佛
南無持上功德佛 南無紺身佛
南無師子頰佛 南無寶讚佛
南無眾王佛 南無遊步佛
南無安隱佛 南無法差別佛
南無上尊佛 南無極高德佛
南無上師子音佛 南無樂戲佛
南無龍明佛 南無華山佛
南無龍喜佛 南無香自在王佛
南無寶燄山佛 南無天力佛

南無德鬘佛 南無龍首佛

南無因莊嚴佛 南無善行意佛

南無智勝佛 南無無量日佛

南無實語佛 南無持炬佛

南無定意佛 南無無量形佛

須菩提 若有善男子善女人 初日分以恆河沙等身布施 中日分復以恆河沙等身布施 後日分亦以恆河沙等身布施 如是無量百千萬億劫 以身布施 若復有人 聞此經典 信心不逆 其福勝彼 何況書寫受持讀誦 為人解說 須菩提 以要言之 是經有不可思議 不可稱量無邊功德 如來為發大乘者說 為發最上乘者說 若有人能受持讀誦 廣為人說 如來悉知是人 悉見是人 皆得成就不可量 不可稱 無有邊 不可思議功德 如是人等 即為荷擔如來 阿耨多羅三藐三菩提 何以故 須菩提 若樂小法者 著我見 人見 眾生見 壽者見 即於此經不能聽受讀誦 為人解說 須菩提 在在處處 若有此經 一切世間 天人阿修羅 所應供養

當知此處 即為是塔 皆應恭敬 作禮圍繞 以諸華香而散其處 復次須
菩提 若善男子善女人 受持讀誦此經 若為人輕賤 是人先世罪業 應
墮惡道 以今世人輕賤故 先世罪業即為消滅 當得阿耨多羅三藐三菩提
須菩提 我念過去無量阿僧祇劫 於然燈佛前 得值八百四十萬億那由他
諸佛 悉皆供養承事 無空過者 若復有人於後末世 能受持讀誦此經
所得功德 於我所供養諸佛功德 百分不及一 百千萬億分 乃至算數譬
喻 所不能及 須菩提 若善男子善女人 於後末世有受持讀誦此經 所
得功德 我若具說者 或有人聞 心即狂亂 狐疑不信 須菩提 當知是
經 義不可思議 果報亦不可思議

南無明照佛 南無最勝燈佛

南無斷疑佛 南無莊嚴身佛

南無不虛步佛 南無覺悟佛

南無華相佛 南無山主王佛

南無善威儀佛 南無徧見佛

南無無量名佛 南無寶天佛

南無滅過佛 南無持甘露佛

南無人月佛 南無喜見佛

南無莊嚴佛 南無珠明佛

南無山頂佛 南無到彼岸佛

南無法積佛 南無定義佛

南無施願佛 南無寶聚佛

南無住義佛 南無滿意佛

南無上讚佛 南無慈德佛

南無無垢佛 南無梵天佛

爾時須菩提 白佛言 世尊 善男子善女人 發阿耨多羅三藐三菩提心

云何應住 云何降伏其心 佛告須菩提 善男子善女人 發阿耨多羅三藐

三菩提者 當生如是心 我應滅度一切眾生 滅度一切眾生已 而無有一

眾生實滅度者 何以故 須菩提 若菩薩有我相 人相 眾生相 壽者相

即非菩薩 所以者何 須菩提 實無有法 發阿耨多羅三藐三菩提心者
須菩提 於意云何 如來於然燈佛所 有法得阿耨多羅三藐三菩提不
也 世尊 如我解佛所說義 佛於然燈佛所 無有法得阿耨多羅三藐三菩
提 佛言如是如是 須菩提 實無有法 如來得阿耨多羅三藐三菩提 須
菩提 若有法 如來得阿耨多羅三藐三菩提者 然燈佛即不與我授記 汝
於來世 當得作佛 號釋迦牟尼 以實無有法 得阿耨多羅三藐三菩提
是故然燈佛與我授記 作是言 汝於來世 當得作佛 號釋迦牟尼 何以
故 如來者 即諸法如義 若有人言 如來得阿耨多羅三藐三菩提 須菩
提 實無有法 佛得阿耨多羅三藐三菩提 須菩提 如來所得阿耨多羅三
藐三菩提 於是中無實無虛 是故如來說一切法 皆是佛法 須菩提 所
言一切法者 即非一切法 是故名一切法 須菩提 譬如人身長大 須菩
提言 世尊 如來說人身長大 即為非大身 是名大身 須菩提 菩薩亦
如是 若作是言 我當滅度無量眾生 即不名菩薩 何以故 須菩提 實
無有法 名為菩薩 是故佛說一切法 無我 無人 無眾生 無壽者 須
菩提 若菩薩作是言 我當莊嚴佛土 是不名菩薩 何以故 如來說莊嚴

佛土者 即非莊嚴 是名莊嚴 須菩提 若菩薩通達無我法者 如來說名
真是菩薩

南無華明佛 南無身差別佛

南無法明佛 南無盡見佛

南無德淨佛 南無月面佛

南無寶燈佛 南無寶璫佛

南無上名佛 南無作名佛

南無無量音佛 南無違藍佛

南無師子身佛 南無明意佛

南無無能勝佛 南無功德品佛

南無海慧佛 南無得勢佛

南無無邊行佛 南無開華佛

南無淨垢佛 南無見一切義佛

南無勇力佛 南無富足佛

南無福德佛 南無隨時佛
南無慶音佛 南無功德敬佛
南無廣意佛 南無善寂滅佛

香讚

心然五分 普徧十方 香煙童子悟真常
鼻觀妙難量 瑞靄祥光 堪獻法
中王

懺悔偈

我昔所造諸惡業 皆由無始貪嗔癡
從身語意之所生 一切我今皆懺悔

大乘金剛般若寶懺卷下

香讚

梅檀海岸 爐爇名香 耶輸母子兩無殃 火內得清涼 至心今將 一炷徧十方

南無香雲蓋菩薩摩訶薩（三稱）

須菩提 於意云何 如來有肉眼不 如是世尊 如來有肉眼 須菩提 於
意云何 如來有天眼不 如是世尊 如來有天眼 須菩提 於意云何 如
來有慧眼不 如是世尊 如來有慧眼 須菩提 於意云何 如來有法眼不
如是世尊 如來有法眼 須菩提 於意云何 如來有佛眼不 如是世尊
如來有佛眼 須菩提 於意云何 如恒河中所有沙 佛說是沙不 如是世
尊 如來說是沙 須菩提 於意云何 如一恒河中 所有沙 有如是沙等
恒河 是諸恒河 所有沙數佛世界 如是寧為多不 甚多 世尊 佛告須
菩提 爾所國土中 所有眾生若干種心 如來悉知 何以故 如來說諸心

皆為非心 是名為心 所以者何 須菩提 過去心不可得 現在心不可得 未來心不可得

四八端嚴微妙相 僧祇三大劫修來
面如滿月目如蓮 天上人間咸恭敬

南無財天佛 南無淨斷疑佛

南無無量持佛 南無妙樂佛

南無不負佛 南無無住佛

南無得叉迦佛 南無眾首佛

南無世光佛 南無多德佛

南無弗沙佛 南無無邊威德佛

南無義意佛 南無藥王佛

南無斷惡佛 南無無熱佛

南無善調佛 南無名德佛

南無華德佛 南無勇得佛

南無金剛軍佛 南無大德佛

南無寂滅意佛 南無無邊音佛

南無大威光佛 南無善住佛

南無無所負佛 南無離疑惑佛

南無電相佛 南無恭敬佛

南無威德守佛 南無智日佛

南無上利佛 南無須彌頂佛

南無淨心佛 南無治怨賊佛

南無離小高佛 南無應讚佛

南無智次佛 南無那羅達佛

須菩提 於意云何 若有人滿三千大千世界七寶 以用布施 是人以是因緣 得福多不 如是世尊 此人以是因緣 得福甚多 須菩提 若福德有實 如來不說得福德多 以福德無故 如來說得福德多 須菩提 於意云何 佛可以具足色身見不 不也 世尊 如來不應以具足色身見 何以故

如來說具足色身 即非具足色身 是名具足色身 須菩提 於意云何 如
來可以具足諸相見不 不也 世尊 如來不應以具足諸相見 何以故 如
來說諸相具足 即非具足 是名諸相具足 須菩提 汝勿謂如來作是念
我當有所說法 莫作是念 何以故 若人言 如來有所說法 即為謗佛
不能解我所說故 須菩提 說法者 無法可說 是名說法 爾時慧命須菩
提白佛言 世尊 頗有眾生 於未來世 聞說是法 生信心不 佛言須菩
提 彼非眾生 非不眾生 何以故 須菩提 眾生眾生者 如來說非眾生
是名眾生 須菩提白佛言 世尊 佛得阿耨多羅三藐三菩提 為無所得耶
佛言 如是如是 須菩提 我於阿耨多羅三藐三菩提 乃至無有少法可得
是名阿耨多羅三藐三菩提 復次須菩提 是法平等 無有高下 是名阿耨
多羅三藐三菩提 以無我 無人 無眾生 無壽者 修一切善法 即得阿
耨多羅三藐三菩提 須菩提 所謂善法者 如來說即非善法 是名善法

南無常樂佛 南無不少國佛

南無天名佛 南無雲德佛

南無甚良佛 南無多功德佛
南無寶月佛 南無莊嚴頂髻佛
南無樂禪佛 南無無所少佛
南無遊戲佛 南無德寶佛
南無應名稱佛 南無華身佛
南無大音聲佛 南無辯才讚佛
南無金剛珠佛 南無無量壽佛
南無珠莊嚴佛 南無大王佛
南無德高行佛 南無高名佛
南無百光佛 南無喜悅佛
南無龍步佛 南無意願佛
南無妙寶佛 南無滅已佛
南無法幢佛 南無調御佛

須菩提 若三千大千世界中 所有諸須彌山王 如是等七寶聚 有人持用
布施 若人以此般若波羅蜜經 乃至四句偈等 受持讀誦 為他人說 於
前福德百分不及一 百千萬億分 乃至算數譬喻 所不能及 須菩提 於
意云何 汝等勿謂如來作是念 我當度眾生 須菩提 莫作是念 何以故
實無有眾生 如來度者 若有眾生 如來度者 如來即有我人眾生壽者
須菩提 如來說有我者 即非有我 而凡夫之人 以為有我 須菩提 凡
夫者 如來說即非凡夫 是名凡夫 須菩提 於意云何 可以三十二相觀
如來不 須菩提言 如是如是 以三十二相觀如來 佛言 須菩提 若以三
十二相觀如來者 轉輪聖王即是如來 須菩提白佛言 世尊 如我解佛所
說義 不應以三十二相觀如來 爾時世尊 而說偈言

若以色見我 以音聲求我
是人行邪道 不能見如來

須菩提 汝若作是念 如來不以具足相故 得阿耨多羅三藐三菩提 須菩
提 莫作是念 如來不以具足相故 得阿耨多羅三藐三菩提 須菩提 汝

若作是念 發阿耨多羅三藐三菩提心者 說諸法斷滅 莫作是念 何以故
發阿耨多羅三藐三菩提心者 於法不說斷滅相 須菩提 若菩薩以滿恒河
沙等世界七寶 持用布施 若復有人 知一切法無我 得成於忍 此菩薩
勝前菩薩 所得功德 何以故 須菩提 以諸菩薩不受福德故 須菩提白
佛言 世尊 云何菩薩不受福德 須菩提 菩薩所作福德 不應貪著 是
故說不受福德

南無喜自在佛 南無寶髻佛

南無離山佛 南無淨天佛

南無華冠佛 南無淨名佛

南無威德寂滅佛 南無愛相佛

南無多天佛 南無須臾摩佛

南無天威佛 南無妙德王佛

南無寶步佛 南無師子分佛

南無最尊勝佛 南無人王佛

南無栴檀雲佛 南無紺眼佛

南無寶威德佛 南無德乘佛

南無覺想佛 南無香濟佛

南無喜莊嚴佛 南無勝慧佛

南無離愛佛 南無慈相佛

南無妙香佛 南無堅鎧佛

須菩提 若有人言 如來若來若去 若坐若臥 是人不解我所說義 何以故 如來者 無所從來 亦無所去 故名如來 須菩提 若善男子善女人 以三千大千世界 碎為微塵 於意云何 是微塵眾寧為多不 須菩提言 甚多 世尊 何以故 若是微塵眾實有者 佛即不說是微塵眾 所以者何 佛說微塵眾 即非微塵眾 是名微塵眾 世尊 如來所說三千大千世界 即非世界 是名世界 何以故 若世界實有者 即是一合相 如來說一合相 即非一合相 是名一合相 須菩提 一合相者 即是不可說 但凡夫之人 貪著其事 須菩提 若人言 佛說我見 人見 眾生見 壽者見

須菩提 於意云何 是人解我所說義不 不也 世尊 是不解如來所說
義 何以故 世尊說我見 人見 眾生見 壽者見 即非我見 人見 眾
生見 壽者見 是名我見 人見 眾生見 壽者見 須菩提 發阿耨多羅
三藐三菩提心者 於一切法 應如是知 如是見 如是信解 不生法相
須菩提 所言法相者 如來說即非法相 是名法相 須菩提 若有人以滿
無量阿僧祇世界七寶 持用布施 若有善男子善女人 發菩提心者 持於
此經 乃至四句偈等 受持讀誦 為人演說 其福勝彼 云何為人演說
不取於相 如如不動 何以故

一切有為法 如夢幻泡影
如露亦如電 應作如是觀

佛說是經已 長者須菩提 及諸比丘比丘尼 優婆塞優婆夷 一切世間天
人阿修羅等 聞佛所說 皆大歡喜 信受奉行

南無威德猛佛 南無珠鎧佛

南無仁賢佛 南無善逝月佛
南無梵自在佛 南無師子月佛
南無觀察慧佛 南無正生佛
南無高勝佛 南無日觀佛
南無寶名佛 南無大精進佛
南無山光佛 南無德聚王佛
南無供養名佛 南無法讚佛
南無施明佛 南無電德佛
南無寶語佛 南無救命佛
南無善戒佛 南無善眾佛
南無堅固慧佛 南無破有闇佛
南無善勝佛 南無師子光佛
南無照明佛 南無寶成就佛
南無利慧佛 南無珠月光佛
南無威光佛 南無不破論佛

南無光明王佛 南無珠輪佛
南無金剛慧佛 南無吉手佛
南無善月佛 南無寶燄佛
南無羅睺守佛 南無樂菩提佛

讚

斷疑生信 絕相超宗 頓忘人法解真空 般若味重重 四句融通 福德普
昌隆（或：福壽普昌隆）

南無金剛會上佛菩薩（三稱）

迴向偈

願以此功德 普及於一切
我等與眾生 皆共成佛道

迴向偈

禮懺功德殊勝行 無邊勝福皆迴向

普願沉溺諸眾生 速往無量光佛刹

十方三世一切佛 一切菩薩摩訶薩

摩訶般若波羅蜜

(金剛寶懺終)